


Fulan Juñu - Jullu 2013

SDB no FMA

HAFUTAR AN HO KÓR KSOLOK NIAN

Oratóriu iha Tímor: Uma fiar nian



“Ksolok mak ai-fuan fiar nian: rekoñese Ninia domin no Ninia amizade loron-loron. Tanba loron-loron iha ksolok simples barak ne'ebé Maromak haraik mai ita.”

Amo Papa emeritu Bentu XVI

TEMPU ORDINARIU

Ho fulan juñu hahú ona tempu “ordináriu” no ita foin celebra “Sagrado Coração de Jesus” hodi agradese Na'i ba domin ne'ebé nia hatudu ba mundu tomak liuhusi ninia Oan Jezús. Ba ita-nia espiritualidade salesiana, tempu ida ne'e mós tempu ho folin boot: ita-nia Santu no Santa sira fó hanoin beibeik ba malu atu halo buat hotu ne'ebé “ordináriu” (bain-bain) ho modun ka estilu “extraordináriu” (oin seluk, didi'ak). Dom Bosco no Madre Mazzarello husu ba foin-sa'e sira laran metin iha sira-nia knaar loron-loron nian, tanba iha knaar ida ne'e sira sei hetan Maromak nia hakarak. Atu bele tuir buat ne'ebé ita-nia Fundadór sira gosta, presiza “konstansia”, katak ba oin nafatin, maski susar ka, liu tiha tempu ruma, ita sente katak buat hotu hanesan nafatin, sai ona rutine. Iha fulan rua ne'e, ita koko atu hakle'an aspetu ida ne'e no “buka” eh “agradese” ema sira ne'ebé, ho konstansia, akompaña ita iha ita-nia moris.



ATIVIDADE síra

Premiu “Konstantine”

Premiu ida ne'e sei fó ba sira ne'ebé fiel ba sira-nia atividade ka presente nafatin iha oratóriu. La lika buka “sasán” nu'udar premiu (maibé se imi iha buat ruma, bele fó de'it), importante atu fó rekoñesimentu ba labarik, foin-sa'e, animadór sira ne'ebé laran-metin iha sira-nia knaar no hala'o ho ksolok buat hotu. Bele hili labarik sira ne'ebé la falta ba atividade oratóriu nian, ka edukadór

sira ne'ebé presente nafatin iha oratóriu no iha enkontru atu prepara atividade, ka akolitu sira ne'ebé prontu nafatin atu serbí Missa... se hakarak bele mós konsidera inan ka aman ruma ne'ebé tulun imi iha atividade oratóriu nian, zeladora ruma ne'ebé tulun atu hamoos Uma Kreda ka Kapela...

Ita hakarak rekoñese sira-nia empenhu, la'ós atu gaba sira, maibé atu sira bele sai modelu ba ema seluk no mós atu ita hotu aprende agradese ba buat ne'ebé ita simu “bain-bain” no la fó folin. Atu fó rekoñesimentu ida ne'e, bele prepara Diploma ida atu entrega ba sira, ka bele bolu sira durante Missa no fó medalha ida...

2

Entre sira ne'ebé hala'o ho konstansia sira-nia knaar, ita hakarak fó importánsia ba sira ne'ebé akompaña ita-nia moris: aman-inan sira, ita-nia mestre sira, katekista sira.... ita fiar katak Maromak tau sira iha ita-nia dalan atu ita hotu bele buras iha fiar no domin. Bele haruka oratorianu sira atu entrevista sira hodi husu ba sira atitude sa de'it sira hanoin katak importante atu hala'o sira-nia knaar nu'udar edukadór/a ne'ebé akompaña ho domin ema seluk.


Se hakarak bele mós halo kuiz: hili tiha ema sira ne'ebé “akompañadór di'ak, foti informasaun kona-ba sira, hafoin fahe oratorianu sira ba grupu no halo kuiz ho estrutura hanesan ba ema ida-idak: (ez)

- Nia moris iha....
- Nia kaben (la kaben)
- Nia gosta kór....
- Nia gosta halo....
- Nia dehan beibeik liafuan....

Grupú ida-idak bele koko atu hatán kedas bainhira hato'o pergunta: se grupu ida hatán ba pergunta a), nia manán pontu 5, se b) 4, se c) 3... Bainhira grupu ida si'ik ona ema nia naran, hahú fali hato'o pergunta sira kona-ba ema seluk.

HAFUTARAN HO KÓRKSOLOK NIAN

3



Filme

Iha filme barak ne'ebé hatudu foin-sa'e ka labarik ida ne'ebé haka'as an ho konstansia atu to'o ninia mehi hodi la susar kole ka terus. Iha ne'e propoin 2:

BILLY ELLIOT: istória kona-ba labarik mane ida ne'ebé gosta dansa “klasiku” iha ambiente ida iha ne'ebé mane sira hatene tuku malu de'it. Maski protagonista filme nian mak labarik ida, di'ak liu haree filme ida ne'e ho foin-sa'e sira no refleto ho sira saida mak Billy tenke hasoru atu bele hala'o buat ne'ebé nia gosta no iha kapasidade.

FREE STYLE: Cale mak foin-sa'e ida ne'ebé gosta motor “free style” (karik imi haree programa ne'ebé hala'o iha loron 20 maiu ba Festa Independência nian), maibé nia familia la riku, nune'e, atu bele partisipa ba atividade ne'e, Cale serbisu iha fatin rua, no bainhira ema foti fali ninia motor, nia buka dalan atu bele kontinua. Filme ida ne'e mós bele tulun atu refleto katak iha ita-nia moris la iha buat ida ne'ebé fasil, maibé ita presiza “manán” buat ne'ebé ita hakarak ho konstansia no empeñu.



Ha'u-nia moris nia dalan

JOGU

Objetivu: deskobre katak, iha ita-nia moris, ita bele hili dalan, maibé dalan ne'ebé fasil liu bele fó rezultadu ki'ik liu!

Materiál: billete ki'ik oan iha ne'ebé hakerek numeru ida (husi 1 to'o 4) atu fó ba jogadór ida-idak; bola 2; ain, fatuk, kadeira, tali... (materiál ne'ebé bele uza atu halo “dalan” halai nian). Relojiu atu bele sura tempu: tenke deside molok hahú jogu, atu kontinua durante minutu hira. Bainhira tempu hotu ona, sei sura grupu ida-idak nia pontu.


Preparasaun: fahe jogadór sira ba grupu 2 no fó ba sira ida-idak billete ida ho valór. Animadór sira prepara dalan 2 (haree dezeńu) ba grupu ida-idak hodi tau sasán ne'ebé tenke sees, ka haksoit, ka dolar iha tali okos.... Dalan 1 fasil liu, ladún iha “obstakulu”, dalan 2 (ne'ebé hasoru malu ho dalan 2 grupu seluk nian) komplikadu liu, jogadór tenke hetan difikuldade oin-oin.

Grupú ida-idak hamriik iha sira-nia fatin (A no B) hodi halo fileira no kaer sira-nia billete. Ida ne'ebé hamriik iha oin iha mós bola.

Bainhira jogu hahú, jogadór ne'ebé iha oin hahú halai: jogadór ida-idak bele hili ninia dalan; kundu nia halai, nia bele mós aproveita hodi kona kolega husi grupu seluk ne'ebé karik halai iha dalan 2 (sira ne'ebé hili dalan 1 bele tuda bola, maibé ema seluk la bele tuda sira). Bainhira to'o remata dalan, jogadór entrega ninia billete ba animadór, ne'ebé sei sura pontu grupu nian: se halo dalan 1 pontu hanesan buat ne'ebé hakerek iha billete, maibé se hili dalan 2, folin iha billete sai dala tolu (se jogadór lori billete ho 3, manán pontu 9 ba ninia grupu).

Bainhira bola kona jogadór ne'ebé halai iha dalan 2, nia tenke para iha fatin no hein ba kolega ida ne'ebé hili atu halo dalan 2 ne'ebé sei halo nia livre hodi halai hamutuk to'o remata dalan... maibé kuidadu tanba kolega sira husi grupu seluk bele tuda mós nia!

Jogu ida ne'e tuir tempu





ISTÓRIA

Loron ida, foin-sa'e ida ba hasoru katuas matenek ida hodi husu konsellu: "Oinsá ha'u bele hatene katak buat hotu ne'ebé ha'u halo tuir maromak nia planu? Oinsá

ha'u bele seguro katak ha'u uza didi'ak ha'u-nia moris?" Katuas hamansa midar, hafoin haktuir ba foin-sa'e ida ne'e mehi ida ne'ebé nia halo bainhira hasoru pergunta hanesan iha ninia moris.

"Ha'u mehi katak ha'u iha bisikleta ho fatin rua atu tuur: tandem. Ha'u tuur iha oin no Maromak tuur iha ha'u-nia kotuk no book ninia ain hodi tulun ha'u atu hala'i maka'as liu. Maibé, teki-teki, Maromak propoin mai ha'u atu troka fatin no ha'u ba tuur iha kotuk: husi momentu ida ne'ebá ha'u-nia moris troka liu! Maromak halo ha'u haksolok liu no ho emosaun barak. Saida mak troka? Bainhira ha'u mak ka'er bisikleta, ha'u hatene ona dalan, nafatin hanesan. Maibé bainhira Maromak hahú kaer, Nia hatene dalan sira ne'ebé liu husi foho, husi ailaran, nia halai maka'as, tun sa'e... fou-foun ha'u-nia preokupasaun tomak atu la monu husi bisikleta! Nia kaer hanesan bulak no repete beibeik mai ha'u: "Book ó -nia ain, book ó-nia ain!". Dala ruma ha'u ansi, ta'uk: "Na'i, Ita lori ha'u atu ba ne'ebé?", maibé Nia hamnasa midar no la hatán. Maski nune'e, neineik ha'u hahú konfia iha Nia, ha'u haluha ona ha'u-nia dalan "bainbain" sira, hanesan nafatin, no ha'u tama iha aventura. Bainhira



ha'u dehan: "Na'i, ha'u ta'uk...", Nia hamnasa midar fali no Ninia liman kona ha'u-nian; ha'u sente aten-barani kedas, no ta'uk nakfilak ba sentimentu hakmatek. Nia lori ha'u atu ba hasoru ema ne'ebé iha presente ne'ebé ha'u presiza: kapasidade atu rona, ksolok, hakmatek... ema sira ne'e fó presente sira mai ha'u, maibé bainhira ami-nia rua kontinua ami-nia viajen, Maromak dehan: "Fó presente sira ne'e ba ema seluk, sira todan atu lori ho bisikleta". Ha'u fó presente sira ba ema ne'ebé ami hasoru no ami-na'in viajen sai kmaan no ha'u simu ksolok boot liu fali buat ne'ebé ha'u fó ba ema sira. Bainhira Nia foin kaer

ha'u-nia bisikleta, ha'u hanoin katak nia atu lori ha'u ba dezastre, maibé ha'u deskobre katak nia hatene bisikleta nia segredu tomak, nia hatene halai iha kurva, haksoit ho bisikleta iha ne'ebé dalan la kabér... neineik ha'u aprende atu nonok, atu la halo komentariu nar-naran

de'it, maibé atu kontempla fatin sira iha ne'ebé nia lori ha'u ba. No bainhira ha'u sente katak ha'u la bele ona, Nia hateke mai ha'u, hamnasa midar no dehan: "Keta preokupa, book ó-nia ain bá!"

Se mak kaer ita-nia "bisikleta"? Ita husik Maromak akompañá ita iha akontesimentu loron-loron nian, ka ita ta'uk atu buka no deskobre Maromak nia planu ba ita-nia moris? Se ita hakarak moris ida, nakonu ho ksolok no domin... husik Maromak kaer ita-nia moris nia volante!



DOM BOSCO nia esperiéncia

(istória ida ne'e bele haktuir, ka bele halo diálogo ho oratorianu sira, ka prepara drama badak)

N: Domingu ida, Carlo Buzzetti ba oratóriu hamutuk ho ninia alin Giuseppe, labarik ki'ik oan ida ho oin kamutis no ta'uk kona-ba buat hotu.

C: Dom Bosco, ida ne'e ha'u-nia alin Giuseppe. Nia tinan 10 de'it.

DB: Ha'u mak ó-nia maun nia belun, nune'e ha'u sei sai mós ó-nia belun. Ó atu serbisu iha ne'ebé?

G: Hamutuk ho Carlo, maibé ha'u ta'uk serbisu na'in...

N: Kalan, molok ba fali uma, Giuseppe hakbesik Dom Bosco hodi dehan:

G: Keta husik ha'u mesak. Favór ida, Dom Bosco, ba vizita ha'u.

N: Loron tuir mai, Dom Bosco ba sira nia fatin serbisu nian. Bainhira Carlo no Giuseppe rona Dom Bosco nia lian, sira haksolok liu no bolu nia.

G + C: Ami mak ne'e



HAFUTARAN HO KÓR KSOLOK NIAN

N: Dom Bosco sa'e fatuk leten, hakbesik sira, ko'alia ba sira. Ba sira momentu ida ne'e mak momentu festa nian, maibé Giuseppe murmura:

G: Balde todan liu, loron sei naruk... ha'u la bele tahan!

DB: Mai, tuir ha'u, ita ba ko'alia ho serbisu na'in.

N: Dom Bosco buka serbisu na'in (ne'ebé oin suar, maibé la'ós ema aat) no esplika ba nia katak Dom Bosco prontu atu sai garante kona-ba labarik sira-nia serbisu, maibé mós nia tenke kuidaду atu fó serbisu tuir sira-nia tinan; la bele todan liu! Hodi hateke ba Giuseppe, Dom Bosco dehan:

DB: Ida ne'e sei labarik. Oinsá bele tau balde boot nakonu ho rai-henek iha ninia kbaas?

N: Ho hahalok simples hanesan ida ne'e, Dom Bosco hahú soi labarik sira ne'ebé hakbesik nia. Giuseppe Buzzetti sei hadomi Dom Bosco hanesan (ka liu) nia aman rasik; nia sei la haketak an ona husi Dom Bosco. Husi fulan marsu 1842 to'o loron 31 janeiru 1888, momentu ne'ebé Dom Bosco mate, Giuseppe Buzzetti moris iha Dom Bosco nia sorin, hakmatek no kontente atu bele sai sasin kona-ba amlulik ida ne'e ne'ebé "hadomi nia". Ho ninia matan rasik, Giuseppe haree akontesimentu barak, ne'ebé ema hanoin "legenda", maibé nia, ne'ebé besik Dom Bosco nafatin, haree milagre sira ne'ebé domin bele halo.




IMAJEN

Kuadru ida ne'e hatudu "instrumentu" sira ne'ebé Maromak uza atu akompaña ita-nia dalan fiar nian.

Hamutuk ho oratorianu sira koko atu komprende simbolu ida-idak refere ba saida; halo lista no, tuir dezeńu ida ne'e, tau sira tuir orden importánsia nian.

(se bele, di'ak liu hatudu dezeńu ida ne'e ho kór, tanba fasíl liu atu rekoñese simbolu sira)



ORASAUN

OBRIGADU BA...

L: Obrigadu ba oratóriu, iha ne'ebé sente domin

H: Na'i, ami agradese Ita ba domin ne'ebé ami simu iha oratóriu ida ne'e no tulun ami atu bele sai ema ne'ebé hatene simu no hadomi ema hotu, sira ne'ebé ami gosta no sira ne'ebé iha karakter ladún simpatiku.

L: Obrigadu Na'i ba oratóriu, iha ne'ebé ema bele haksolok

H: Na'i, ami agradese Ita ba ksolok ne'ebé loron-loron ema fahe ho ami ho gratuidade; tulun ami atu sai ema ne'ebé hatene habelar ksolok liuhusi hahalok ki'ik loron-loron nian.

L: Obrigadu Na'i ba oratóriu, iha ne'ebé bele moris tuir santidade

H: Na'i, ami agradese Ita tanba iha ne'e ami bele hasoru Ita, no ami bele hake'an ami-nia amizade ho Ita. Tulun ami atu aproveita didi'ak ho oportunidade sira ne'ebé animadór sira oferece mai ami atu hatene Ita no hadomi Ita. Halo ami kolabora atu hari'i ambiente ksolok no domin nian iha oratóriu.